



Komunikadu Imprensa
18 Marsu 2024

Estrutura Aldeia Oemolo, Oekusi, simu informasaun kona-ba Prosesu Justisa Formál hosi JSMP

Iha 22 Feveireiru 2024, JSMP kontinua realiza dezaminasaun informasaun kona-ba asesu ba justisa formál ba estrutura Aldeia no mós comunidade sira iha aldeia Oemolo, Suku Lifau, Sub-Rejiaun Administrativu Espesiál Oekusi-Ambeno (RAEOA) ba Programa Apoiu Seguransa Komunitáriu (PASK).

Objetivu hosi dezaminasaun informasaun ne'e mak atu hasa'e koñesimentu estrutura aldeia no comunidade sira-nian kona-ba oinsá asesu ba justisa formál no asegura rezolve kazu disputa sira no seluk tan iha aldeia ho baze tuir lei formál sira ne'ebé vigora ona.

“JSMP fiar katak sesaun dezaminasaun informasaun ba estrutura aldeia sira no comunidade iha aldeia Oemolo ne'e bele tulun hasa'e estrutura aldeia no comunidade sira nia koñesimentu kona-ba prosesu justisa formál ne'ebé sai hanesan parte ida hosi akordu Nota Entendimentu (MoU) entre Suku Lifau ho JSMP iha programa apoiu seguransa komunitáriu, hodi responde ba preokupasaun ne'ebé xefe aldeia no comunidade sira hato'o iha asesmentu JSMP nian, bainhira serbisu hamutuk ho Suku Lifau,” dehan Sra. Ana Paula Marçal, Diretora Ezekutiva JSMP.

Materia iha treinamentu ne'e kona-ba definisaun hosi lei no se mak atu respeita lei, definisaun kona-ba krime, tipu krime, tipu pena no oinsa atu prosesu kazu krime sira ho natureza krime públiku no krime semi públiku no saida mak estrutura aldeia sira bele halo hodi tulun comunidade sira ba rezolve sira nia disputa iha aldeia. Alende ne'e, matéria kobre mós prosesu kazu sivil tuir justisa formál no serbisu rede referral nian iha assisténsia legál ba vítima Violénsia Bazeia ba Jéneru (VBJ).

Depoisde rona tiha apresentasaun matéria hosi JSMP, autoridade lokál ho membru comunidade sira iha preokupasaun kona-ba implementasaun Lei Kontra Violénsia Doméstika (LKVD) ne'ebé mak dala barak liu mane mak sala hela de'it maibé dala barak asaun ne'e mosu tanba hetan provokasaun uluk hosi feto sira babain ko'alia la kontrola tantu iha uma ka fatin públiku sira? Hatan ba ida ne'e, JSMP responde katak mezmú nune'e la'os tenke responde ho krime, maibé iha maneira seluk atu bele hatan, ezemplu bolu malu hodi ko'alia ba malu la'os tenke responde ho krime, kuandu akontese ona aktu krime ne'ebé envolve feen ho la'en, ka oan ho aman ka inan, ka ema ne'ebé

iha dependensia ekonómia, tuir Lei Kontra Violénsia Doméstika konsidera hanesan krime públiku, nune'e ema se de'it bainhira haree no hatene bele halo keixa ba polísia ka ministériu públiku.

Parte seluk, comunidade husu mós kona-ba tipu haat hosi violénsia doméstika no númeru ne'ebé a'as iha Timor-Leste no oinsa ho tribunál nia maneira hodi hamenus kazu sira ho natureza violénsia doméstika iha futuru? Hatan ba ida ne'e, JSMP esplika katak tipu haat hosi forma violénsia doméstika mak violénsia fíziku, violénsia seksuál, violénsia psikolójika no violénsia ekonómika no bazeia ba monitorizasaun JSMP nian iha tribunál krime ne'ebé aas mak krime violénsia doméstika.

Alende ne'e, tribunál mós iha nia estratéjia rasik oinsa atu prevene aktu krime ne'e iha futuru mak bainhira iha agresaun fízika kmaan no foin primeiravés, tribunál sei konsidera bele aplika de'it kastigu ho pena prizaun maibé suspende ninia ezekusaun signifika katak arguidu la ba iha prizaun, maibé durante suspensaun nia laran labele komete tan krime seluk, se komete tan krime seluk sei ba hatan iha prizaun tuir pena ne'ebé antes ne'e tribunál kondena ona ba arguidu, no kontinua prosesa krime foun. Iha parte seluk, enkuantu aktu krime ida kuandu konsidera hanesan sirkunstánsia agravante hanesan arguidu nia hahalok ne'e tuir tribunál no tuir lei labele tolera inklui mós iha repetisaun ba aktu krime sira no meu sira ne'ebé tribunál uza ba prevene krime refere mak tenke ba iha prizaun, atu nune'e arguidu bele hadia-an hosi nia atitude iha prizaun atu bele evita aktu refere labele akontese tan iha futuru no bele mós eduka ema seluk atu la halo krime.

Xefe aldeia Oemolo, Sr. Adelino Nono ho membru comunidade sira ne'ebé partisipa iha treinamentu ne'e, iha sira nia intervensaun konsidera katak atividade dezaminasaun informasaun ne'ebé JSMP halo importante tebes tanba bele tulun ona sira hodi hatene oinsá bele rezolve sira nia kazu iha justisa komunitáriu no oinsá bele lori sira nia kazu hodi prosesu ba iha justisa formál.

Partisipante ne'ebé partisipa iha dezaminasaun informasaun ne'e hamutuk ema na'in 29 ne'ebé kompostu hosi feto 11 no mane 18. Partisipante sira mak hanesan xefe Suku Lifau, OPS suku, xefe aldeia Oemolo, delegadu/a, juventude feto, PAAS, xefe bairo, lia-na'in, estudante estajáriu hosi UNPAZ no mós comunidade balun.

Atividade ne'e realiza hosi JSMP liuhosi Programa Apoiu Seguransa Komunitariu (PASK), tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor - Leste.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl